



Gabinete Fronteiras Marítimas
Konsellu ba Delimitasaun
Definitiva ba Fronteiras
Marítimas Díli, Timor-Leste
+670 7742 5544
info@gfm.tl
www.gfm.tl

Indonézia - Reuniaun esploratória kona-ba fronteiras marítimas, Bali, 10-11 dezembru 2018 no Singapura 26-27 febreiru 2019

Reuniaun esploratória kona-ba fronteiras marítimas ho Indonézia ne'e halao iha Bali iha 10-11 dezembru 2018 no iha Singapura iha 26-27 febreiru 2019. S.E. Xefe Negosiador Xanana Gusmão mak lidera delegasaun Timor-Leste nian ne'ebé mos inklui S.E. Embaixador Roberto Soares, Asistente Especial ba Xefe Negosiador no Xefe Ekipa Tékniku ba Negosiasaun Fronteiras Terrestres, Elizabeth Exposto, Diretora Ezekutiva GFM no Marcos da Costa, Konselleiru ba Timor-Leste nia Embaixada iha Jakarta. Delegasaun Indonézia nian Sr. Damos Dumoli Agusman, Diretor Jeral ba Asuntus Juridikus no Tratadus Internasional, Ministériu Negósios Estranjeirus, mak lidera. Nasaun rua ne'e hasoru malu ho espíritu kooperativa hodi ko'alia kona-ba kestaun prinsipal tékniku no administrasaun nian. Sorumutu iha Bali no Singapura ne'e produtivu no pozitivu ba delimitasaun fronteira marítima ho Indonézia tuir lei internacional, no Nasoens Unidas nia Konvensaun kona-ba Lei Tasi nian.



Reuniaun Esploratória Dahuluk ho Indonézia, iha Bali, 11 dezembru 2018



Reuniaun Esploratória Daruak ho Indonézia, iha Singapura, 27 febreiru 2019

Konsultasaun Oficial Senior nian ba dahaat kona-ba Fronteiras Terrestres, 13-14 dezembru 2018

Konsultasaun Oficial Senior nian ba dahaat kona-ba fronteiras terrestres entre Timor-Leste ho Indonézia ne'e halao iha Díli iha 13-14 dezembru 2018. Reuniaun ne'e atinji progresu boot ida, hodi tau fundasaun ba akordu final ida kona-ba fronteiras terrestres entre nasaun rua ne'e. S.E. Xefe Negosiador Xanana Gusmão halo abertura ba delegasaun sira hodi ko'alia kona-ba segmentu rua iha fronteira ne'ebé seidak rezolve, mak Noel Besi/Citrana no Bidjael Sunan-Oben. Importante liu mak, nasaun rua ne'e konkorda ona atu halao vizita conjunta ba terrenu, no konkorda mos termu referensia ba áreas hirak ne'ebé sei ba halo vizita conjunta ne'e. Ida ne'e hakat importante tebes ida ne'ebé presiza hodi apoia desizaun hodi rezolve fronteiras final. Vizita conjunta ne'e sei halao iha semetre dahuluk 2019 nian.



Konsultasaun Oficial Senior nian ba dahaat kona-ba Fronteiras Terrestres entre Timor-Leste no Indonézia, dezembru 2018





S.E. Primeiru Ministru Taur Matan Ruak ho delegasaun husi Vanuatu, Dili, 6 febreiru 2019

Vanuatu – Timor-Leste vizita interkambiu, 30 novembru -1 dezembru 2018, no 4-7 febreiru 2019

S.E. Xefe Negosiador Xanana Gusmão lidera delegasaun kiik ida husi Timor-Leste ba Vanuatu hodi hasoru malu ho Prezidente interinu no Prezidente Parlamentu Esmon Saimon, Primeiru-Ministru Charlot Salwai, Ministru Negosius Estranjeirus Ralph Regenvanu, no orgaun governu sira seluk hodi haforsa tan relasaun bilateral entre Timor-Leste no Vanuatu. Vanuatu hanesan apoiante forte ida ba Timor-Leste dezde faze inisiu rezistensia nian. Vizita ne'e mos fô oportunidade ida ba Timor-Leste hodi fahe nia esperiensia foun iha prosesu konsiliausaun obrigatória hodi rezolve nia disputa fronteira marítima ho Austrália. Vanuatu oras ne'e iha situausaun hanesan, iha disputa ho Fransa kona-ba fronteira marítima entre Vanuatu no Nova Kaledonia, teritória Fransa nian.

Vanuatu mos halo hanesan hodi mai vizita Timor-Leste iha febreiru 2019. Vanuatu nia Xefe Komite Nasional ba Delimitasaun Fronteira Marítima no Membre Parlamentu Sr. Johnny Koanapo lidera delegasaun kiik ida mai Timor-Leste husi 4-7 febreiru 2019. Delegasaun ne'e inklui Prokurador Jeral Sr. Arnold Kiel Loughman, Xefe Divizaun Kooperasaun Interna no Komersiu Esterior, Ministériu Negósios Estranjeirus Sr. Yvon Basil, no Xefe

Divizaun Marítima no Oseanu, Ministériu Negósios Estranjeirus Sr. Toney Tevi. Vizita ida ne'e hanesan oportunidade ida hodi haforsa tan relasaun bilateral entre nasaun rua ne'e no aprende liu tan kona-ba Timor-Leste no negosiasaun kona-ba fronteira marítima nian. Vanuatu agradece Timor-Leste ba informasaun, konsellu no solidariedade.



S.E. Xefe Negosiador Xanana Gusmão hasoru malu ho Prezidente Interinu no Prezidente Parlamentu Esmon Saimon, iha Port Vila, 30 novembru 2018

Fórum Enerjia Global iha Abu Dhabi, 11-13 janeiru 2019, Abu Dhabi, Emiradus Árabes Unidos

Timor-Leste simu konvite hodi partisipa iha Fórum Enerjia Global Konsellu Atlantiku Global nian iha Abu Dhabi ba daruak, fórum ida ne'ebé koñesidu iha mundu internasional ba governu, indústria no akademia hodi haree ba kestaun importante no mudansa iha mundu enerjia nian. Halao iha Sua Alteza Sheikh Mohammed bin Zayed Al Nahyan, Príncipe erdeiru Abu Dhabi nian nia mahan, Fórum ne'e Konsellu Atlántiku mak konvoka, Timor-Leste nia parseiru liuhusi Programa Parseria ho Sosiedade Sivil EUA nian.

Husi 11-13 janeiru 2019, S.E. Xefe Negosiador Xanana Gusmão ho delegasaun kiik ida husi GFM, inklui Diretora Ezekutiva Elizabeth Exposto no Ekipa Rekursus nian, inklui Ministru Designadu Petrolíferu, Alfredo Pires no Prezidente ANPM, Gualdino da Silva vizita Abu Dhabi hodi partisipa iha Fórum Enerjia Global no halao mos reuniaun balu ho lideres prominete EAU no lideres mundial sira seluk inklui Sekretáriu Estadu Amérika nian ba Rekursus Frank Fannon, gestores Fundu Soberana, no kompañia mina sira. Xefe Negosiador mos simu konvite hodi fô diskursu prinsipal rua iha Fórum ne'e, no mos fô palestra iha Akademia Diplomata Emiradus.



S.E. Xefe Negosiador fô diskursu prinsipal ida iha diskusaun painel: Tranzisaun husi ekonomia ida ne'ebé depende ba rekursu no evita malisan rekursu nian, 11 janeiru 2019



S.E. Xefe Negosiador Xanana Gusmão ho estudante sira Akademia Diplomata Emiradus iha Abu Dhabi, 13 janeiru 2019

Konferênsia Internasional ba dala 9 kona-ba Edukasaun Direitus Umanus iha Universidade Western Sydney, 27 novembru 2018

S.E. Xefe Negosiador Xanana Gusmão simu konvite ida hodi fó diskursu prinsipal ida iha Konferênsia Internasional ba dala 9 kona-ba Edukasaun Direitus Umanus iha Universidade Western Sydney iha Austrália iha 27 novembru 2018. Iha nia diskursu, titulu “Halibur Direitus Umanus ba Independênsia no Demokrasia,” S.E. ko’alia kona-ba Timor-Leste nia istória no Timoroan sira nia forsa no korajen. Nia hateten katak edukasaun ne’e fundamental tebes, atu garante katak ema komprende direitus umanus no envolvimentu síviku nia importánsia. Nia mos ko’alia kona-ba kestaun demokrasia no dezafius iha mundu ohin loron. Nia ko’alia kona-ba papel instituisaun sira nian, inklui Nasoens Unidas no nia papel hodi fasilita prosesu konsiliausaun obrigatória ba fronteira marítima ho Austrália foin lalais ne’e.



S.E. Xefe Negosiador Xanana Gusmão fó nia diskursu: “Halibur Direitus Umanus ba Independênsia no Demokrasia,” iha Universidade Western Sydney, 27 novembru 2018

S.E. Xefe Negosiador vizita Monte Sant’ Angelo Mercy College, 27 novembru 2018

S.E. Xefe Negosiador Xanana Gusmão fó diskursu ba estudante sira iha Monte Sant’ Angelo Mercy College. Iha nia diskursu ho titulu “Feto Forte, Nasaun Forte” ka “Strong woman, strong nation,” nia fahe nia ideas kona-ba oportunidade, responsabilidade no dezafius, no mos nia teoria kona-ba esperiênsia edukasional estudantes Timoroan no Australia nian. Xefe Negosiador louva Monte Sant’ Angelo Mercy College ba nia valor iha servisu comunidade, justisa no dignidade umana. Eskola ne’e fó apoiu ba eskola iha Maliana liuhusi Sentru Treinamentu ba Profesores Profesional, Programa Food for Thought no Programa Bolsu Estudus. Eskola ne’e mos ko’alia makas hodi fó nia apoiu ba Timor-Leste nia luta hodi defini nia fronteiras marítimas iha Tasi Timor.



S.E. Xefe Negosiador Xanana Gusmão vizita estudante sira iha Monte Sant’ Angelo Mercy College, Sydney, 27 novembru 2018

Reuniaun agradamentu ho grupu solidariedade Australia nian, Sydney, 27 novembru 2019

S.E. Xefe Negosiador Xanana Gusmão hasoru malu ho grupu Australianu apoiante Timor-Leste nian durante tinan barak nia laran. Xefe Negosiador fô onra ba sira nia esforsu hodi fô apoiu ba povu Timor-Leste durante luta ba independensia no foin lalais ne'e ba disputa ho Austrália kona-ba fronteiras marítimas. Nia fô korajen ba grupu ne'e hodi hametin nafatin lasu amizade ne'ebé forte entre nasaun rua iha futuru.

Semináriu Nasional kona-ba fronteiras marítimas nia impaktu ba Timor-Leste nia atidadeas petrolíferas, CCD, 8 dezembru 2018

GFM servisu hamutuk ho ANPM no TIMOR GAP hodi fô apoiu ba S.E. Xefe Negosiador Xanana Gusmão hodi halao semináriu nasional iha CCD (Sentru Konvensaun Díli) hodi fornese informasaun kona-ba Timor-Leste nia atidadeas petrolíferas foin lalais ne'e, tuir fali rezolusaun disputa ba fronteira marítima ho Austrália. Durante semináriu loron tomak ne'e, Xefe Negosiador ko'alia kona-ba Timor-Leste nia fronteiras marítimas no atidadeas rekursus foin lalais inklui prosesu no razaun sosa asaun husi ConocoPhillips no Shell. Prezidente ANPM, Sr Gualdino da Silva esprika kona-ba Timor-Leste nia partisipasaun iha Joint Venture ba dezvoltamentu Greater Sunrise no Diretor Ezekutivu no Prezidente TIMOR GAP, Francisco Monteiro, ko'alia kona-ba progresu dezvoltamentu Tasi Mane nian.



S.E. Xefe Negosiador Xanana Gusmão ho apoiante sira husi Austrália iha Sydney, 27 novembru 2019

Ema 1000 resin mak atende seminariu ne'e no fô sai transmisaun direta liuhusi GMNTV no TVTL. Iha nia diskursu ikus, Xefe Negosiador bolu ba setor idak-idak: agrikultura, defeza, negosius, veteranus, foinsa'e sira no setor privadu sira atu servisu makas hodi kontribui ba Timor-Leste nia dezvoltamentu.



S.E. Xefe Negosiador Xanana Gusmão iha CCD durante Konferensia Nasional kona-ba Fronteiras Marítimas, Díli, 8 novembru 2018

BOLETIN NOTÍCIA

Novembru 2018 – Marsu 2019

Atu hetan tan informasaun bele kontaktu:

Gabinete Fronteiras Marítimas

Konsellu ba Delimitasaun Definitiva ba Fronteiras Marítimas
Governo Repúblika Demokrátika Timor-Leste
info@gfm.tl
+670 7742 5544



**Gabinete
Fronteiras
Marítimas**